



Clas Gàidhlig Gairm.

Cuid de'n chloinn bhig a bha aig a' chlas an uiridh, comhla ris an dithis luchd teagaisg—Anna NicLeòid agus “Jake” MacDhomhnuill.

FOGHNAIDH sud de na bùthan. Tha aon rud eile bu mhath leam iomradh a dhèanamh air, agus is e sin Clas Gàidhlig Gairm a bha ann am Aitreabh nan Gaidheal fad na ràithe so chaidh. Bha an clas airson leanaban beaga—trì bliadhna gu còig bliadhna—fo stiùireadh Anna NicLeòid agus Iain A (no Jake) MhicDhomhnuill. Nam faiceadh sibhse an fheadhainn bheaga, mu dheich thar fhichead aca, a h-uile maduinn Di-Sathuirne. Bha iad ann an sud air an làn dòigh, a' cluiche 's ag ionnsachadh Gàidhlighe còmhla ri Anna agus ri Jake. Abraibh gun robh iad a' togail Gàidhlig cuideachd! Sud an aois air a son, agus tha mi toilichte a chluinntinn gum bheilear gu bhith gabhail clann suas gu aona-bliadhna-deug an ath bhliadhna. Bithidh iad a' coinneachadh ann an sgoil mu choinneamh Aitreabh nan Gaidheal (am Boys' High) far am bheil iad a' dol a dh'fhaotainn trì seòmraichean bho Chomhairle Foghlaim Ghlaschu. Gheibh iad de Ghàidhlig an sin na bheir gu ìre na h-àird sgoile iad. Ged nach biodh ann ach gum faigh na màthraichean fois air maduinn Di-Sathuirne!

THA cion nan duilleagan a' cur glas-ghuib orm mata. Tha Alasdair ag radha gur ann 'na làn àm a chuir rud-eiginn glas-ghuib orm! Ach feuchadh sibhse gun sgrìobh sibh mu rud sam bith a tha a' cur ceiste oirbh—no ma chluinneas sibh sgeulachd bheag no dòigh co-caireachd àraidh, no gu dearbha, rud sam bith eile a tha sibh an dùil a chòrdas ris na mnathan eile a bhios a leughadh *Gairm*.